

Илбагъандан белчлудила бетуцлизир хлябалра бяхичибиз дарх дузахъес гягилбиркур, цалра гелалахъели.

Ишди программабани дарган мезла дурсрачиб дурхнала хатл ункъдиклахънила чебкатси хлянчира бузахъни тлалаббирусисаби. Дарган мезла учительличиб чебси саби бучлантала хатл къугъати диахъес къайгъилизиев виевса.

Чедирти (5-11) классунала бучланти жузачил сабил пайдалабирахъес бурсибирниличи анцлукъ бетикес гягилнисаби, сенклун учитель даим мякълав хлейрар, багъудлума биалли лерилра гямрулизир кайсес гягилнити сари. Ишди программабани цабутлаван жузазирад чус чули багъудлума кайсахъес дурхни бурсибарнила мурадра тлашбалтуси саби.

Пергъиси замана Дагъистайзир миллатунала мез дучлахънила шайчир гяхлцад далдуцуни дурадурклули сари: бехибихъудла классуназир арагелрира-сера лерил дурсри (гъайгъайра, хасси предмет саблин, урус мезла дурсри халхледарили) миллатла мезличил кадирхъни; урга даражала чедирти классуназирра булан (10-11) миллатла мезани руркънилис хаста гягилтуну деклардарни, сарира гъалар агарти; шагъуртала школабазирра Дагъиста деклар-декларти миллатунала дурхнала хаста къукъни цаладахъили, нешла мезла дурсри кадирхъни.

Ишди сагати программаби хлясибли дарган мез 11 ибил классличи бикайчи делчлахъес чеблахъуси саби, илхеллира гъалар урдалтули дуибти грамматикала бутлинира алавуцули: фразеология, стилистика, орфоэпия, диалектология. Ишди программабани дарган мез гъаларичир тинтлели ва мурхъли делчлахъес тлалаббинули саби.

Ишхелла манзилла тлалабуни ва мурадуни хлясибли, дарган мезла шайчир бучлантала имцлалли саркъибти ва гячихъти бурсидешуни дизс гягилнити сари. Чедирти классунала цацабехлти дурхни жягилла студентуни сабину, илди, практикалалаш ахленну теориялашлар гяхлил хлядурбуубтили бизс гягилнити саби. Илбагъандан ишди программабани мезла цацадехл къиянти суалтачира бучлантала пикри битлакес ибси масъала тлашбалтули саби.

Гъайгъайра, 10-11 ибти классуназир дарган мех дучлилис чедлахъибти гягилтуну камти сари (жумягилзиб ца гягилт). Вецъибил класслизир чедлахъибти 34 гягилти лексика, фразеология, стилистика, фонетика ва морфология делчлес гягилнили сари, 11 ибил класслизиб синтаксис. Камли сари илди гягилтуну.

Илбагъандан учительлис маслигъатбируси саби, гъалар делчлунти темаби тикрардирли, илди сагати баянтачил чедицлахъни, гелргъити дусмала гилмула сархибдешуначи хъарихъули, дурхнала багъудлума тинтидиклахъни.

Ишхелли даргала гяхлцад гъалабяхл арбякъунси ва мягилничерти чедибдешуни сархибси художественная литература лоб, сунезирра лерилра-сера жанраби ва жураби аклахъуси. Ил литературный мезличил белклунси саби.

Гъарли-марли чекабизурли ва бархъли, сегъунтипра гъарацлешуни агарли, даргала литературный мезличил гъайбиклила бурсидешуни тлалабдирли сари бучлантазирад ишди программабани. Илала дурабад, дурхнани гячихъли багъес гягилнисаби даргала литературный мез аклила история ва илди къулайдиклахънила шайчибси гялимтала ва педагогунала хлянчи.

Урга даражала школа таманбирити дурхнани литературный мезла (орфоэпияла) къайдуртанил дарх луклила къайдуртира ункъли далес гягилнити сари.

Дарган мезла дахъал диалектуни ва лугъатуни лерни гячихъси саби. Дурхнала дахъалгъунти хатлабира илди лугъатунала хълчиличир алклули дирар. Илбагъандан программабазиб пикри бяхичиули саби дарган мезла диалектунала ва лугъатунала хлеклизирра дурхнала белгити багъудлума диахъниличи.

Дарган мезла дурхнала творчестволаси бяхичибиз бяхънира лайикъсили чебиули саби. Илбагъандан халкъла мухлила произведениеби (хабурти, далуйти, буралаби, багъираби, фразеологизмаби) дурчниличи деклар-декларти поэтунала ва писательтала